

南京政府第二十五

組織政府乃革命成敗一大關鍵故各省事畢即接此篇

自武漢起兵未一月響應者十餘省各不相屬形渙勢弱蘇都督程德全浙都督湯壽潛滬都督陳其美電各省遣代表集滬議建臨時政府以爲中樞而鄂都督黎元洪亦有電請各省舉代表赴鄂當是時江浙偉人以政府宜在甯滬而鄂代表謂湖北首起義功高黎元洪宜爲大都督政府宜建武昌持甚力東南各省無以難也十月戊戌各省代表團議決以武昌爲中央政府黎元洪爲大都督由滬赴鄂仍各留滬一人通訊鄂遣代表胡瑛等與會於漢口英租界議決臨時政府組織大

綱二十一條時漢陽已爲清兵攻陷武昌居炮火下危甚會蘇浙民軍攻克金陵代表會卽議決以南京爲臨時政府所在地期七日內集南京開臨時大總統選舉會鄂代表亦不執初議矣漢陽之陷黃興獨身走至滬滬都督陳其美以北伐軍援鄂軍亟須統一說留滬代表舉黃興爲大元帥黎元洪爲副元帥元洪辭謝武昌代表會聞之謂留滬代表無組織政府權梗議蘇浙民軍將領亦揚言不願隸漢陽敗將下而屬意於大都督黎元洪戊午武昌代表會來甯會袁內閣亦遣唐紹儀爲議和大臣嚴修楊士琦爲參贊大臣赴武昌議和紹

儀宣傳袁內閣密旨亦贊成共和也代表會卽議決緩舉大總統待酬勲勤而承認上海所舉之大元帥副元帥并修改組織臨時政府大綱云大總統未舉定前其職權由大元帥暫任之辛酉黃興電辭大元帥職是日代表會改舉黎元洪爲大元帥黃興爲副元帥元洪鎮武昌由副元帥代行職權立臨時政府以伍廷芳溫宗堯主外交廷芳宗堯以滬事繁難就鄂紹儀等不得已與各省代表亦赴滬於是民軍主力自武昌移於甯滬黨人以大元帥黃興降爲副元帥辱莫大叫囂黃興亦電辭不至議迎黎元洪來甯就職旣而黎大元帥來電

承受大元帥名義並委任副元帥代行職權使者交錯

於途而黃興訖不至黎黃久不相下

六字包括無限情事筆力雄遠當

是時革命黨魁孫文來滬滬黨人揚言舉文爲大總統
利國家代表會切望政府成立且忱禍十一月癸酉在
甯開選舉臨時大總統會文以十七票當選爲中華民國
臨時大總統而取消前舉之大元帥副元帥文歷史
詳革命源流篇丙子大總統孫文蒞甯行就職禮各省
代表暨海陸軍代表畢集大總統宣誓詞曰傾覆滿洲
專制政府鞏固中華民國圖謀民生幸福國民之公意
文實遵之盡忠於國爲眾服務至專制政府既倒國內

無變亂。民國卓立於世界。爲列邦公認。文當解臨時大總統職。謹誓於國民。大總統宣誓畢。各省代表以印授大總統。復致詞曰。惟漢曾孫失政。東口猾夏。帝制自爲。垂三百年。我皇漢慈孫。呻吟屈抑。慕美利堅法蘭西人平等之制。用是羣謀眾策。仰視俯劃。思所以傾覆虐政。恢復人權。迺斷脰戡胸。羣起號召。流血建議。續美法人共和之戰史。今三分天下。克復有二。用是建立民國。期成政府。推置總統。僉意能尊重共和。宣達民意。惟公賢。廓清專制。鞏衛自由。惟公賢。光復禹域。克定河朔。舉漢蒙滿回藏羣倫共覆於平等之政。亦惟公賢。用是投匭。

度情徵壓紐之信眾意所屬羣謀僉同既協眾符歡欣
擁戴繫我國民久困鈐制疾首蹙額望民主若歲幸公
軒車蒞止蒼白扶杖子女加額感激涕零誠欲忭舞自
由申昌平等敦重民權用是以四百兆民命二億里河
山委之於公責綦重哉繼自今惟公翼翼毋違憲法毋
拂輿意毋任威福毋崇專制毋昵非德毋任匪才凡吾
共和國民有不矢忠矢信至誠愛戴軒轅金天列祖列
宗七十二代之君實聞斯言代表等受國民委託重任
敢不盡意謹致大總統璽綬俾公發號施令崇爲符信
欽念哉初各省獨立多以黃帝紀年後因世界各國皆

用陽厯中國宜從同代表團乃決議改用陽厯大總統就職日正陽厯一月一日是爲中華民國紀元之始

點題

鄭重戊寅大總統蒞代表會提出國務員九人經會同意

以黃興爲陸軍總長黃鍾瑛海軍總長王寵惠外交總

長伍廷芳司法總長陳錦濤財政總長程德全內務總

長蔡元培教育總長張謇實業總長湯壽潛交通總長

初臨時政府組織大綱無副總統之規定黎元洪既舉

爲大元帥不數日又舉孫文爲大總統大元帥消滅輿

論訝爲不公惴憂大局湖南代表宋教仁首倡議修改

條文增設副總統卽日舉黎元洪爲副總統臨時政府

至是粗具各省代表會依政府組織大綱代行參議院職權參議院成立自此始時軍用浩繁政費無所出文與陸軍總長黃興秘書長胡漢民祕謀貸金日本而以漢冶萍煤鐵礦爲質參議院大譁嚴詞詰問湖北議員張伯烈時功玖劉成禹等相繼辭職政府懼而止文威望無以懾服各省號令不能下行內務總長程德全交通總長湯壽潛實業總長張謇辭不就職大事恆決於黃興文受成而已當是時清內閣袁世凱握文武全權憚結怨國民勒兵不戰志覆清室南京政府亦自知力不逮許世凱以民國第一任大總統建設統一國家及

優待清室諸條件約定二月戊午清室遜位孫大總統
提出辭職書於參議院并薦賢自代云現清帝退位專
制已除民國確已成立本總統當踐誓言辭職引退貴
院應代表國民速舉賢能來南京接事以便解職至改
選賢能原國民公權本總統實無容喙之地惟前使伍
代表有約以清帝實行退位袁世凱宣布政見贊同共
和本總統卽當推讓提議於貴院亦表同情此次清帝
退位南北統一袁君之力實多其發表政見更爲絕對
贊同舉爲公僕必能盡忠民國且袁君富於政治經驗
民國統一建設需才故敢以私見貢於貴院請爲民國

前途計勿失當選之人。越二日辛酉參議院開臨時大總統選舉會。孫大總統復蒞院申前議。於是清內閣袁世凱亦以十七票當選爲中華民國臨時大總統。臨時副總統黎元洪辭職。參議院復開臨時副總統選舉會。黎元洪亦以十七票當選爲臨時副總統。初孫大總統之提辭職書。推袁世凱爲大總統也。并附有條件一。臨時政府設於南京。不能更改。二。新總統親到南京受任。時大總統及國務員乃辭職。三。臨時政府約法爲參議院所制定。新總統必須遵守。前頒布之一切法律章程。非經參議院改訂。仍繼續有效。參議院卽開會討論。其

第二條第三條皆可決。第一條臨時政府所在地議決。改設於北京。翌日孫大總統咨交覆議。陸軍總長黃興遣甲士至院示威。參議員遂自翻前議。又議決臨時政府仍在南京。卽遣專使蔡元培汪兆銘等赴北京迎袁大總統來南京就職。既而北京兵變。袁大總統不能南下。參議院允袁大總統在北京就職。語詳北京政府成立篇。初南京政府成立。悉依據臨時政府組織大綱。採用美國總統制。故有國務員而無內閣總理。及大勢所趨。袁世凱爲總統。宜參議院卽修改臨時政府組織大綱。而爲臨時約法。採用法郎西內閣制。

民國根本大法
治亂所關故大

書特書此種嚴重
筆法又絕類陳志
自二月開議三月告成都七章五十

六條四月丁未朔孫大總統蒞參議院行解職禮致詞
畢昇臨時大總統印交還參議院參議院致答詞未幾
參議院議決臨時政府仍在北京南京政府遂畢文將
辭職致祭明陵曰中華民國元年二月十五日辛酉臨
時大總統孫文謹昭告於大明太祖開天行道肇基立
極大聖至神仁文義武俊德成功高皇帝之靈曰嗚呼
國家外患振古有聞趙宋末造代於蒙古神州陸沈幾
及百年我高皇帝應時崛起廓清中土日月重明河山
再造光復大義昭示來茲不幸季世俶擾國力疲敝滿

清乘間入據中夏。嗟我邦人諸父兄弟迭起迭蹕。至於二百六十有八年。嗚呼時怨時恫。亦二百六十有八年也。歲在辛亥八月。武漢軍興。建立民國。義聲所播。天下響應。越八十有七日。旣光復十有七省。國民公議立臨時政府於南京。文以薄德。被推爲臨時大總統。瞻顧西北。未盡昭蘇。負疚在躬。尙無以對我高皇帝在天之靈。邇者以全國軍人之同心。士大夫之正誼。卒使清室幡然悔悟。於本月十二日。宣布退位。從此中華民國完全統一。邦人諸友。享自由之幸福。永永無已。實維我高皇帝光復大義。有以牖啟後人。成茲鴻業。文與全國同胞。

至於今日始敢告無罪於我高皇帝敬於文奉身引退之前代表國民貢其歡欣鼓舞之公意惟我高皇帝實鑒臨之敬告

以祭明太祖作結韻味悠揚不盡而體勢愈覺典重裔皇

此篇先有鄂滬之爭中有黎黃孫之爭後又有南京北京之爭千流萬派屈曲奔赴無竭蹶之態靡不顯之情而書法莊嚴用筆典重讀之但覺民國開國氣象璀璨崢嶸也

中華民國臨時政府組織大綱

第一章 臨時大總統

第一條 臨時大總統由各省都督府代表選舉之以

得票滿投票總數三分之二以上者爲當選
代表投票權每省以一票爲限

第二條 臨時大總統有統治全國之權

第三條 臨時大總統有統率陸海軍之權

第四條 臨時大總統得參議院之同意有宣戰媾和
及締結條約之權

第五條 臨時大總統得參議院之同意有任用各部
長及遣派外交專使之權

第六條 臨時大總統得參議院之同意有設立臨時
中央審判所之權

第二章 參議院

第七條 參議院以各省都督府所派之參議員組織之

第八條 參議院每省三人爲限其遣派方法由各省都督府自定之

第九條 參議院會議時每參議員有一表決權

第十條 參議院之職權如左

一 議決第四條及第六條事件

二 承諾第五條事件

三 議決臨時政府之豫算